

Sats for omsorgsstønad.

Omsorgsstønad er økonomisk ytelse som kan giast til personar som har eit særleg tyngjande omsorgsarbeid og utfører omsorgsoppgåver som elles ville ha vorte utførte av kommunen. Vanlegvis vert det gitt i samband med pleie og omsorg av eldre sjuke personar, alvorleg funksjonshemma vaksne og multifunksjonshemma barn. Det er omsorgsoppgåva si tyngde som er avgjerande, ikkje pasienten sin alder eller tilstand.

Omsorgsstønad vert innvilga av kommunen etter søknad og individuell vurdering av behov, og kommunen kan velja å gi andre tenester i staden for omsorgsstønad.

Nivå på stønad er uavhengig av mottakar sin alder eller utdanning og vert fastsett av kommunen. Ordninga med omsorgsstønad tek ikkje sikte på å gi full timeløn, men er meint som ei godtgjering til dei som har særleg tyngjande omsorgsarbeid.

Ut frå rundskriv ser det ut til at anbefaling er å plassera sats for omsorgsstønad nær sats for lågaste lønsnivå for assistent, d.v.s. kr. 166,60 pr. time (lønsoppgjer 01.05.22)

I Vaksdal er timesatsen kr. 125,- pr. time, og satsen har vore uendra i mange år.

Det er innhenta sats frå 8 kommunar i regionen for å samanlikna. Satsane varier mykje, frå kr. 95,- pr. time opp mot kr. 176,-. Vaksdal ser ut til å liggja i mellomsjiktet når det gjeld sats for omsorgsstønad, godt over lågaste nivå, men under lønsnivå for assistent som fleire kommunar nyttar.

Dei kommunar som nyttar høgare satsar (t.d. høgaste ansiennitet for assistent), skiljer vanlegvis mellom nivå på omsorgsstønad og kan operera med to satsar etter kor tyngjande oppgåvene er. I tillegg har fleire kommunar som praksis å vurdere omsorgsstønad saman med andre ytingar som t.d. hjelpestønad, og gir fråtrekk i stønad for dei som har andre ytingar.

Det er lenge sidan satsen for omsorgsstønad vart endra i Vaksdal kommune, og det kan vera argument for å endra satsen til nærare lønsnivå for assistent. Samstundes må ein ta med i vurderinga at Vaksdal kommune ikkje er lønsledande på stillingar innan helse, heller ikkje når det gjeld stillingar det er vanskeleg å rekruttera til. Det vert derfor ikkje anbefalt å leggja satsen på linje med dei kommunar som har høgast sats. Det vert heller ikkje anbefalt å leggja opp til meir krevjande praksis der ein har fleire nivå på satsen og gir fråtrekk for dei som mottek anna type stønad.

Ved utgangen av 2. tertial er det 14 personar som mottek omsorgsstønad i Vaksdal kommune. Kostnaden for kommunen for 2022 er kr. 468.000 rekna ut frå tal mottakarar og timar ved utgangen av 2. tertial.

Det er tre alternative forslag til sats for omsorgsstønad f.o.m. 2023. Alternativ 2 og 3, å auka satsen, medfører ekstra årleg kostnad som ikkje er lagt inn i budsjettet. Gitt same tal mottakarar og same timetal, er auken kr. 17 088 ved alternativ 2 og kr. 177 710 for alternativ 3.

Tre alternative satsar for omsorgsstønad f.o.m. 2023:

1. Satsen vert som før, kr. 125.
2. Satsen vert heva med 3,5 % til kr. 129 pr. time. Auka sats er ikkje lagt inn i ramma for budsjett 2023 og vil utgjera ein årleg ekstra kostnad på kr. 17 088.
3. Satsen vert heva til same nivå som minsteløn for assistent, kr. 166,60 pr. time. Auka sats er ikkje lagt inn i rammene for budsjett 2023 og vil utgjera ein årleg ekstra kostnad på kr. 177 710.